

Qua Vadis?

EVANGELISASIEBLAD VAN DIE GEREFORMEERDE KERKE IN SUID-AFRIKA

Geregistreer by die poskantoor as nuusblad

NR. 13

Uitgegee deur die Deputate vir Evangelisasie van die Gereformeerde Kerk in Suid-Afrika, Posbus 20008, Noordbrug 2522, Potchefstroom en gedruk deur die Potchefstroom Herald (Edms.) Bpk., Posbus 156, Potchefstroom 2520.

Rus - - Aan die Kruis

Opmerklik is dit dat die Bybel in Joh. 19:30 sê: "En Hy het sy hoof gebuig en die gees gegee".

Die dood het Jesus nie skielik en onvoorbereid gevang nie. Die dood het Hom nie vasgegryp nie. Sy dood was 'n daad — Hy het doodgegaan. Want daarvoor het Hy gelewe — om te sterwe.

Wonderlik ryk is die inhoud van God se Woord juis op hierdie punt. Daar staan geskrywe dat Hy sy hoof gebuig het.

Om dit ten volle te verstaan, moet ons terugblaai na Lukas 9:58 waar staan: "Die jakkalse het gate en voëls van die hemel neste, maar die Seun van die mens het geen plek waar Hy sy hoof kan neerlê nie".

Dit sien op Jesus se armoede. Maar meer nog daarop dat Hy werk gehad het om te volbring. En Hy is haastig om dit klaar te kry. Oral is Hy tot arbeid geroepe, sodat daar geen stilstand of rus vir Hom is nie. Totdat

Totdat Hy aan die kruis vasgespyker is. Ja, eers aan die ruwe vloekhout kan Hy sy hoof neerlê, as Hy sy hoof dáár buig. Want dieselfde Griekse woorde word in albei hierdie tekste gebruik.

Geen rus vir Jesus vóór die kruis nie. Dit was die hoogtepunt en doel van sy lewe. En aan die einde van die kruislyde, as alles volbring is, vind sy hoof rusplek aan die kruis.

Dit is dan 'n fontein van troos vir die gelowiges van alle tye en plekke. Ook vir ons vandag, in hierdie gejaagde rustelose lewe.

Daar is rus by Jesus. Nie meer hoof ons te swoeg en te sweet in 'n poging om God se wet te volbring om ons skuld teenoor God te betaal nie. Ja, al swoeg jy ewiglik, dan sal jy dit tog nooit behaal nie.

Sondaarmens, jy begin deur te glo in Jesus, deur in Hom te rus, want Hy het die stryd volstry, die taak volbring aan God se wil voldoen, God se toorn gestil. Hy vir jou en vir my !

Só begin ons week met die Rusdag. En al ons ander dae is toewyding aan God en vreugdevolle diens van dank.

D. Kempff.

Fonteintjie: Ek sal nooit

"Ai, watter heerlike joligheid was dit nie gisteraand op die partytjie by die van der Merwes nie! Dit was mos LEWE! Die drankies volop en die vrouens so gewillig! En die kostelike grappe wat altyd so skuins was dat baie vroue geblous het! Ja, dit is mos lewe! Dis so anders as die dooilike maniere wat my ouers in my jeug gehad het. Altyd maar ernstig en suur, en altyd maar kerk toe Sondae. Nee, as ek so daaraan terugdink, dan sê ek: Fonteintjie, nooit weer drink ek uit jou nie...."

Was dit miskien al u gedagtes as u laat op 'n Sondagmôre wakker word na so 'n vrolike partytjie? Hoe heerlik om nou in die bed te lê en rus en nie uitgejaag te word om te stewel en te spoor en dan 'n uur lank in 'n bedompige kerkgebou te gaan sit nie. Bietjie later opstaan, en miskien aan my kar gaan werk, of miskien iewers gaan piekniek maak. Watter heerlike vooruitsig!

'n Verligte tyd.

Nee kyk, gelukkig is daardie tyd verby dat die mense alles so fatsoenlik en deftig en formeel gedoen het. Nou leef ons darem in 'n verligte tyd waar elkeen sy persoonlikheid ten volle kan uitleef soos hy dit die aangenaamste vind. Gelukkig is daardie tyd verby dat die klomp fatsoenlikes alle seggenskap gehad het en onskuldige ou dingetjies soos dans en bietjie drankies maak en flirteer met ander vrouens uit die hoogte veroordeel het, en daarin geslaag het om dié wat daaraan skuldig is, aan die skandpaal te hang.

Ja-nee, fonteintjie, nooit weer sal ek jou waters drink nie. Ek sal my eie lewe leef soos ek daarvoor aangelê is en daarvoor lus het en my nie laat voorskrywe deur 'n ou klompie suurknolle nie!

Dit kan met u gebeur.

U, leser, wat tot hiertoe hierdie gedagtes met instemming gelees het, het u al mooi nagedink oor die lewe en wat die betekenis daarvan is? Onthou, u is nou nog gesond en voorspoedig, en u kan die lewe "geniet" soos u dit goeddink. Maar lees maar bietjie u koerante, luister maar bietjie na die nuus oor die radio, en kyk wat gebeur elke dag met ander mense. Mense wat net soos u dink en redeneer en optree, en dan skielik oorval word deur 'n verminkende siekte, of in 'n motorongeluk hulle bene of arms of oë verloor. Ja, dis nou nog ander mense wat so iets oorkom, maar sal dit altyd net ander mense wees, of kan dit nie dalk môre met U gebeur nie? Diep in u binneste weet u, nie waar nie, dat dit dalk more met u kan gebeur. En dan, as u nie meer die lewe kan geniet soos u wil nie, wat gaan u dan doen? Wat gaan die lewe vir u beteken as u miskien sonder bene vir die res van u lewe in 'n rystoel moet rondgestoot word?

Nee, moenie nou probeer weghardloop van hierdie gedagte af nie, moenie dit nou van u probeer afskud nie! Dit sal niks help nie, want so 'n dag kan binnekort vir u aanbreek !!!

Dink terug.

Dink nou liewers terug aan daardie ou dae. Dink terug aan u ouers en leef u bietjie in hulle omstandighede in. Onthou u, toe u nog 'n kind was, daardie groot ramp wat u ouers getref het toe een van hulle kinders gesterf het, of toe die swaar jare van die depressie oor hulle gekom

het, of toe die aanhoudende droogte hulle gebreek het en hulle stad toe moes vlug? Het hulle toe op moedverloor se vlakke gaan sit en u en u ander broers en susters maar in die verwaarlosing gelaat? Of het hulle toe bo-menslike moed en volharding gehad, het hulle toe deurgedruk, al was dit hoe swaar, en vorentoe gebeur en u versorg en gehelp sodat u vandag 'n goeie lewe kan voer? Beantwoord maar hierdie vraag eerlik vir uself!

Ja, u weet nou, nie waar nie, dat hulle so kon moed hou en aanhou omdat hulle gedrink het uit daardie selfde fonteintjie, omdat hulle vertrou het dat hulle 'n Vader in die hemel het wat vir hulle sal sorg. En nou het u mos ook al kinders? As so 'n ramp u gaan tref, gaan u ook so moedhou en aanhou, of gaan u dan maar tou opgooi en u kinders prakties vir die wolwe gooi?

Die Fontein van die lewe.

Ja, u weet wat die antwoord is, nè?

U sien al hoe u kinders verwaarloos en uiteindelik totaal versleg! En dit omdat u nie die moed gehad het om vorentoe te beur nie! Omdat u nie die moed gehad het om oor die teenslag te kom nie! En dit omdat u nie drink by daardie FONTEIN VAN DIE LEWE nie!

Wil, u nog maar sê: "Fonteintjie, ek sal nooit weer nie . . . ", of wil u maar liewers terugkeer? Moenie wag nie, gou kan dit te laat wees!

Keer terug na die Fontein, soek weer die Bybel, en lees in die evangelie van Johannes in hfst. 4 se eerste gedeelte van die ware waters wat ook u nodig het! En blaai dan maar sommer verder na hfst. 10 se eerste gedeelte. Lees daar van die Goeie Herder. Kyk, Hy roep u ook vandag om by sy kudde te behoort. Aan sy kudde gee Hy waarlik "lewe en oorvloed" (vers 10). Hy wil dit ook vir u gee, lewe en oorvloed, nie alleen nou dat u gesond en voorspoedig is nie, maar veral ook as daardie ongeluk u mag tref! U weet mos waar die kerkgebou is? Gaan volgende Sondag weer daarheen en luister wat daar gebeur. U sal hoor wat waarlik LEWE en OORVLOED is, wat u moet doen om ook daardie LEWE en OORVLOED te kry!

J. C. Lessing.

Speedy Jo, Ek praat met JOU!

Hi, julle lekkie duckies daa,
los 'n bietjie die twist, en
kom lyste ees gou wat
hiedie
ou vi Speedy Jo wil ve'tel.

In fel, geel letters, op die rug van jou leerbaadjie, onder 'n vlieënde man, daar staan jou naam:

Speedy Jo

Jy dra bloedrooi sokkies. 'n Klinknaelbroek sluit donkerblou soos 'n stoofpyp om jou kuit. Jy het 'n donkerrooi hemp sonder das. Teen die kroegpaal staan jy hande-in-die-broeksak geleun. Die kougom bring jou mond reëlmatig op en neer. Jy

kyk die verbygangers brutaal aan, en in jou blik lê die vraag: Wat kyk julle na my? Ek lek nie, ek kruip nie. Ek dink nie soos 'n muis nie,

Ek dink soos 'n man!

Roekeloos vleg jy deur die druk verkeer. Met jou 500cc-fiets gehoorsaam jy geen verkeersreël nie. En vas teen jou rug lê jou Sheilah. Haar hare waai wild in die wind. Jy's waaghalsig en hard. Jy is vir geen duiwel bang nie, jy trotseer selfs die dood! Dit is nie die daad van 'n muis nie.

So doen 'n man!

In die kafee-op-die-hoek staan julle om die blêrkas gedrom. En julle ruk-en-rol Elvis Presley se nuutste. Jy lag daar luidrugtig en skel, en onverskrokke hoor ek jou vloek. Dis die taal van geen trut nie.

So praat 'n man!

Speedy Jo, miskien het jou pa en jou ma jou nooit geleer van God nie.

In die Bybel sal jy lees wat God van jou dink.

Jy meen jy dink soos 'n man. Maar God sê: Hy wat niks dink van homself

nie, hy wat dien soos 'n kneg, dit is 'n man. (Luk. 22:24-30) Jy dink

nie soos 'n man nie,

Jy dink soos 'n kind!

Waarna jaag jy? Jou roekeloosheid jou wetsverontagsaming jou geflankeer, so doen geen man nie. God sê : Jaag na My en gryp die ewige lewe, dit doen 'n man. (Filip. 3:8-21) Maar jou daad, is

Die daad van 'n kind!

Speedy Jo, jou vloek en jou lag, dis nie die taal van 'n man nie. Hy is God se man wat sy woorde tel en God bid vir krag. (Jak. 3:1-12) Speedy Jo, ***Jou sterkte lê in God se krag!***

Speedy Jo,

glo jy in Jesus Christus ?

Slegter mense as jy en jou dagga-gang is al deur Jesus Christus uit die modder van hierdie wêreld gered.

Bekeer jou van jou bose weë dan is daar hoop vir jou.

N. DROOMER.

HOE LATER

HOE KWATER

Sê my, as daar iets met u motor verkeerd is, sal u maar aanry totdat dit breek, of sal u dit voor die tyd laat herstel? Baie mense het al die dure ondervinding gehad dat dit nie betaal om met die herstelwerk onnodig te wag nie. 'n Klein foutjie word later 'n groot fout.

Sê my ook, as u geneesheer sê dat u 'n klein operasie moet ondergaan om u van u kwaal te genees, sal u dit maar uitstel totdat dit 'n groot operasie beteken? Daar is ook mense wat dit gedoen het. 'n Aantal van hulle het dit so lank uitgestel dat die begrafnisondernemer die verdere reëlings moes tref.

Al wat na so 'n duur les gesê kan word, is: Ag, as daar tog maar eerder werk van gemaak was.

My verantwoordelikheid.

Sê my nou, u lewe, is dit heeltemal in orde? Nee, ek bedoel nie of u u huisgesin goed versorg of 'n groot polis op u lewe uitgeneem het nie. Ek bedoel hoe u met u lewe voor God staan, — die sonde in u lewe, en nie maar die sonde in die algemeen nie, nee, ek bedoel u eie spesifieke sonde. Ons kan ons nie skuilhou agter die feit dat almal sonde doen nie. **My** sonde is **my** verantwoordelikheid. As ek 'n motorongeluk maak dan is ek die een wat daarvoor verantwoordelik gehou word. Die feit dat honderde ander mense elke dag ongelukke maak, is geen verskoning vir my nie. As ons nie padveiligheid voor oë hou nie, sal die ongeluksyfer styg. As ons nie teen die sonde stry nie, sal dit al hoe erger word.

'n Waarskuwende voorbeeld.

So was dit in die lewe van Saul. Aanvanklik het hy nogal mooi karaktereienskappe getoon. Hy was so nederig dat hy weggekruip het toe hy as koning gesalf moes word. Nadat hy gesalf is, het hy gewoon weg net soos sy onderdane huistoe gegaan. Toe het hy in sy haas gesondig deur self te offer, terwyl dit slegs vir 'n priester toelaatbaar was. Hy het geweet dat hy gesondig het en Samuel het hom bestraf. Hy het geen berou gehad oor sy sonde nie, en dit ook nie erken of om vergiffenis gevra nie. Miskien het hy hom getroos met die gedagte: "Ag almal doen maar sonde". Met Saul het dit van kwaad tot erger gegaan — geen berou — geen stryd teen die sonde, totdat hy sy hand aan sy eie lewe geslaan het.

Teenoor sy lewe staan die van Dawid. Dawid het ook gesondig. Hy het diep geval. Maar hy het geweet wat berou is. Lees Ps. 51. Hierin sien ons hoe groot sy berou was. Hy het teen die sonde gestry

— daarteen geworstel met alle mag. En die Here het hom in genade aangeneem
— hom sy kneg genoem.

Saul het uitgestel. Dawid het gestry.

Vriend, sê my nou nog dit. Sal u, u motor laat herstel, daardie operasie vroegtydig ondergaan, en tog weier om teen die sonde in u lewe te stry, geen berou te hê nie, maar voort te gaan?

Alleen 'n dwaas sal dit doen.

Onthou: HOE LATER HOE KWATER.

W. L. Kuperus.

Hierdie Man ontvang sondaars . . .

"Hierdie Man ontvang sondaars en eet saam met hulle".

Dit is die beswaar van die Fariseërs en skrifgeleerdes teen Jesus Christus, want al die tollenaars en sondaars het die gewoonte gehad om na Hom te kom en na Hom te luister. As hulle kom, ontvang Hy hulle; gaan saam met hulle in hulle huise en eet saam met hulle.

Slegte mense:

Dat Jesus dit gedoen het, was vir hulle te veel, want die tollenaars en sondaars was in die oë van die Fariseërs en Skrifgeleerdes die "slegte" mense. Die tollenaars het die Romeine gehelp om die belasting by die Joodse volk in te vorder. Hulle was handlangers van die vyande en onderdrukkers van die volk. Daarby was hulle oneerlik. Baie van hulle het met hulle oneerlikheid ryk geword.

Die sondaars was eintlik nog slegter mense as die tollenaars. Die Heilige Skrif stel die sondaars op een lyn met die hoere — die slegste vroue wat daar is. Die sondaars het waarskynlik in growwe sondes gelewe.

Tollenaars en sondaars — die slegste mense. Met hulle hou Jesus Hom op; met sulke mense gaan Hy om! Sulke mense ontvang Hy en eet saam met hulle! 'n Mens word aan jou vriende geken. As Jesus Hom met sulke mense ophou, dan is Hy ook so. Daarom het hulle beswaar teen Jesus Christus. Daarom kan hulle, wat goeie mense is, Hom nie aanneem en in Hom glo nie.

Daar het u die beswaar van die ongeloof teen Jesus Christus. Hy is 'n "slegte" Man.

Die Kerk is so en so.

Vandag is daar ook nog mense wat besware het teen die Bybel en die Kerk. Die Bybel is outyds en te nougeset. Die Kerk is so en so. Kyk, wie is ouderling of diaken. Ons ken hulle mos. Ons sien nie kans om saam met hulle kerk toe te gaan nie. Dit is die ou beswaar van die ongeloof teen Jesus Christus: Dit is slegte mense met wie Hy omgaan.

Die Kern van die Evangelie.

Hierdie Man ontvang sondaars en eet saam met hulle. Min het die Fariseërs en skrifgeleerdes geweet dat hulle met hierdie woorde die kern van die evangelie van die genade van Jesus Christus uitdruk. Dit is wat die evangelie is: Hierdie Man ontvang sondaars en eet saam met hulle.

Hy doen dit nie omdat Hy self 'n "slegte" Mens is nie. Hy doen dit omdat Hy gekom het om te red wat verlore is. Die wat verlore is, is juis "slegte" mense. Van die slegte mense — van tollenaars en sondaars — maak Hy goeie kinders van God. Hy het hulle sonde op Hom geneem en daarvoor betaal aan die kruis op Golgota. In hulle harte werk Hy geloof in Hom. Dan word die loflied van die geloof uitgedruk met dieselfde woorde: Hierdie Man ontvang sondaars en eet saam met hulle. Hy is nie te hoogmoedig om Hom met sondaars op te hou nie. Hy is nie vir hulle skaam nie. Hy verstoot hulle nie. Hy ontvang hulle wat hulleself as sondaars voor God leer ken het. Dan is hulle dankbaarbly en juig. Hierdie Man ontvang sondaars en eet saam met hulle. Hy ontvang hulle aan sy nagmaalstafel.

Is daar beswaar in my hart teen Jesus Christus, dan is daar ongeloof.

Is daar dankbaarheid en blydschap in my hart teen Jesus Christus, dan is daar geloof.

I. J. Lessing.

My vrou en ek gaan skei.

So het ek gehoor, ja. Hier is my hand, ou vriend. Jy voel seker maar ellendig oor die hele besigheid. Maar . . . nouja, jy voel dit kan nie anders nie. Saam met so 'n vrou kan 'n mens nie leef nie. Veral die laaste tyd het sy jou lewe vergal (en jy hare). Julle ken geen vrede of geluk meer nie.

En nou hoor ek julle gaan skei.

Jy dink aan jou kindertjies wat jy liefhet. Ná die hofsaak sal hulle seker van jou weggeneem word. In jou verwarde drome en slapelose ure sien jy smekende gesiggies voor jou. Betaande ogies. Pleitende handjies.

Jy gaan hul lewens verwoes . . . My pa en ma is geskei.

Maar, sê jy, dit kan nie anders nie. En tog voel jy soos 'n Judas — jy verrai onskuldige bloed.

Vroeër was dit anders.

Snaaks, vroeër was dit anders. Julle het mekaar liefgehad, voor die preekstoel trou gesweer aan mekaar, en voor God die heilige belofte afgelê (onthou jy nog?) — die belofte wat julle nou gaan verbreek in die egskeidingshof.

Nee, ek wil nie jou vrou goed praat nie, julle het seker maar albei skuld daaraan. Miskien het jy vooraf geweet dat sy 'n losbandige kerklose meisie was, maar dit kon jou nie skeel nie.

En nou het die storm oor jou huis gegaan. En dit het geval.

Waarom ?

Weet jy hoekom, ou vriend? Baie oorsake, ja, maar die grootste: Omdat God nie in jou huis gewoon het nie. Omdat jy jou godsdiens en Christelike beginsels vir die honde gegooi het. Omdat jy nie jou huis van die begin af gebou het op Christus, die rotsfondament nie, maar op sand. Omdat jy die woorde van Christus vir 'n grap opgeneem het waar Hy sê in Mattheüs 7 : 26:

"En elkeen wat na hierdie woorde van My luister en dit nie **doen** nie, sal vergelyk word met 'n dwase man wat sy huis op die sand gebou het. En die reën het geval en die waterstrome het gekom en die winde het gewaai en teen daardie huis aangestorm, en dit het geval, en sy val was groot."

Daarom moes jy dit verwag het. Omdat Christus nie in jou huwelik was nie, sou satan daar inkom, en alles verwoes.

Het jy al dit probeer?

Ek kom nie verwyd nie. Probeer net raad gee (as jy dit wil aanvaar.) Het jy al ernstig tot God gebid dat Hy julle huwelik mag red? Het jy al in jou Bybel gesoek na troos en lig? Of soek jy jou troos maar by die drankbottel? Het jy al saam met jou vrou hieroor probeer bid? Het julle al jul harte gaan uitpraat met jul predikant wat baie graag wil help?

Die saak is nie verlore nie, ou vriend! God wil jou huisgesin red! As jy maar net wil luister.

Die wat na Hom kom, sê Christus, sal Hy nooit uitwerp nie. Hy het gesterf, ook om jou huwelik te reinig met sy versoeningsbloed.

Uit die hemel klink sy magswoord in jou ore: Julle is een vlees. "Wat God dan saamgevoeg

het, mag geen mens skei nie", Mattheüs 19:6.

Gaan jy en jou vrou nogtans skei?

— W. J. Maritz.

IS U VERDWAALD?

Onlangs het ek 'n verhaal gelees van 'n man wat in die sneeuvlaktes van Noord - Kanada verdwaal het. Laat die middag het hy iets gesien wat sy hart van blydschap laat spring het: voor hom in die sneeu was vars voetspore. Hier was nuwe hoop — waar voetspore is, moet mense wees. So vinnig as sy uitgeputte kragte hom kon dra, het hy die spore gevolg.

Dit het laat geword.

Die skemer het vinnig oor die yskoue vlakte begin toeslaan.

Dit sou spoedig moeilik word om die voetspore te sien.

Meteens bemerk die man 'n sneeuformasie reg voor hom waar hy vroeër die middag verbygedwaal het.

Toe het die besef tot hom deurgedring dat dit sy eie voetspore van 'n paar uur te vore is wat hy volg . .

Ken u hom?

Ken u hierdie man?

Is dit nie miskien u eie lewensverhaal hierdie nie?

Alleen op die wêreld.

Die son het verdwyn uit die lewe.

Dit word laat.

Die nag van die ewigheid skemer aan.

En nog het u nie die pad gevind wat huistoe lei nie?

Geen lig êrens in 'n venster wat vriendelik wink en sê hier is lewe nie?

Volg u u eie spore?

Of erger nog; dwaal u voort sonder om te besef dat u in 'n sirkel loop?

Hier is raad vir u.

Die pad huistoe.

Is daar vir u 'n woning, êrens?

Ja.

Die Bybel sê: "Die ewige God is 'n woning" (Deut. 33:27).

In hierdie lewe is die kerk, die gemeente, die woning van God (1 Kor. 3:16).

In die ewigheid na hierdie lewe berei Jesus vir sy gelowiges plek in die ewige Vaderhuis met sy baie wonings (Joh. 14:2).

Langs watter weg moet ons die woning bereik?

Jesus sê: "Ek is die weg en die waarheid en die lewe" (Joh. 14:6).

Hoe verlore?

Omdat die nag naby is, miskien nader as 'n mens dink, is dit nodig om vas te stel hoe verlore u is.

Is u 'n verlore seun?

Die verlore seun het self teruggekeer na die vaderhuis (Luk. 15:18).

Is u 'n verlore **skaap**?

Die verlore skaap moet gesoek word — maar hy kan darem nog blêr, sodat hy makliker gevind word (Luk. 15:4-7).

Is u 'n verlore **penning**?

Die verlore penning is stom — hy lê waar hy verlore geraak het. Hy is sonder reaksie, en as hy nie met 'n lamp en 'n besem gesoek word nie, sal hy ewig in sy verloreheid bly (Luk. 15: 8, 9).

In elke geval is daar blydschap in die hemel oor een sondaar wat hom bekeer (Luk. 15:7, 10, 32).

Soek my, bring my . . .

Is u verdwaald?

"Die Seun van die mens het gekom om te red wat verlore is" (Matth. 18:11).

Bid daarom daagliks hierdie gebed:

Heer, ek is 'n skaap verlore, in die wildernis verdwaal. U, my Heer en Herder,
bid ek dat U my tog wil kom haal. Soek my, bring my weer,
u dienaar wat in al sy harteleed en in al sy teënhede u gebooie nie vergeet
— Ps. 119:63.

P.W.B.